

四庫全書

集部

欽定四庫全書

集部

明詩綜卷四十八

詳校官中書

臣

涂日煥

主事銜

臣徐以坤覆勘

總校官降調編修

臣

倉聖脉

校對官主事

臣

陳墉

謄錄監生

臣

李克文

欽定四庫全書

明詩綜卷四十八

翰林院檢討朱彝尊編

嚴訥一首

訥字敏卿常熟人嘉靖辛丑進士改庶吉士授
編修歷侍講學士禮部侍郎進尚書改吏部加
太子太保兼武英殿大學士卒贈太保諡文靖
有集

對月

良宵不可得清賞詎相逢影落山精鏡光寒織女機林
鳥驚漠漠花露靜輝輝萬里邊城客防秋正未歸

陸樹聲

一首

樹聲字與吉松江華亭人嘉靖辛丑會試第一
改庶吉士授編修累官禮部尚書卒贈太子太
保諡文定有集

靜志居詩話平泉在史館相嵩壽日同館皆更
緋衣入賀公獨青袍立嵩目憫之不為意也其

後定陵踐位即家拜禮部尚書江陵將援之入
閣授以意佯為不覺竟託疾歸江陵大溫比歸
遂不復出天下高之卒時年九
十有八與魏文靖同洵人瑞也

白鷺洲

白鷺洲邊建業城幾經攀折柳條生行人莫漫輕離別
聽唱陽關第四聲

董份一首

份字用均烏程人嘉靖辛丑進士累官禮部尚
書兼翰林院學士有泌園集

送王侍御南還

山木自有枝結交亦有因豈無他人故莫若心所親願
得展婉孌攜手同清塵變故出須臾離別在茲晨如彼
同枝葉一旦東西分子董我食荼各自中苦辛含情各
倉卒匪我言所申

王崇古 二首

崇古字學甫蒲州人嘉靖辛丑進士除刑部主
事累官右僉都御史巡撫寧夏以兵部右侍郎

兼僉都御史總督三邊以右都御史總督宣大
加太子少保進兵部尚書召入協理戎政加少

保卒贈太保諡襄毅有山堂彙纂

李舒章云司馬意氣閒整

詩話襄毅詩格聳高橫梁
自喜然按之不無儒響

別同鄉諸同年

十載看花侶年來半去留江城憐我別霄漢羨君遊柳
暗旗亭道花明禁苑樓征途從此始瞻望不勝愁

登鍾山戍樓

危樓高結跨飛虹
古塔峻嶒對梵宮
北去關河連塞上
西來風物自秦中
洞門暗向前山轉
石井深連幽澗通
扼險應期追一范
不堪搖落戍煙空

方逢時一首

逢時字兆行嘉魚人嘉靖辛丑進士累官少保

兼太子太保兵部尚書有大隱樓集

李時遠云金湖古體

擬曹陸近體上下常侍隨州且得之倚輿橫槩間尤稱絕俗穆敬甫云方公詩氣勢雄豪律

法嚴整如嫖姚出塞萬馬橫嘶而部伍不亂

過天津

城頭初日亂啼鴉
客子行歌上使槎
蜃氣高連蓬島近
鴈行遙度薊門斜
河聲過雨添新漲
草色和煙翳淺沙
聞道邊庭猶苦戰
九關西望動悲茄

呂時中一首

時中字道夫清豐人嘉靖辛丑進士改庶吉士

累官戶部右侍郎有潭西存橐

楊敬甫云呂公七律在開元大

歷間

靈巖寺喜晴和吳學憲

秋山雨過靜朝氛爽氣初開散鹿群倚杖欲攀峰頂樹
披衣猶拂洞中雲青天塔影當巖落曉閣鐘聲別浦聞
自是新晴堪遠眺擬窮丘壑到斜曛

萬士和二首

士和字思節宜興人嘉靖辛丑進士歷官禮部

左侍郎卒諡文恭有萬文恭公摘橐

姜廷善云
履菴詩未

嘗不工然非
刻意求工者

詩話履菴出荆川之門詩派從其師指授然荆川集中罕存酬和之作故履菴有姓名不挂更何論之句及督學貴陽以後詩另入一格荆川乃許之曰讓汝出頭蓋荆川初入館局詩學初唐晚年效邵堯夫謂其天機自動未免頽然自放矣履菴雖宗擊壤而習染未深觀其黔南諸作頗有似柳柳州者

自炎方驛暮宿亦資孔

遠道資人力扶持萬嶺中
仗隨徒隸亂輿放僕夫空雲
動嵐移黑霞收樹斂紅祇貪趨館宿未暇泣途窮

烏撒道中

地當高處峰隨轉雲到窮時路更賒夏半火刀方佈種
晚來牛馬不歸家瘴煙寒鎖蠻村樹嵐霧晴迷客子槎
干羽未能馴鬼國祇貪關市中鹽茶

洪朝選 一首

朝選字舜臣同安人嘉靖辛丑進士歷官刑部
右侍郎有芳洲集

詩話舜臣強直自遂為勞堪羅織斃之獄中士
林多為扼腕時王道思唐應德輩銳意古文辭
舜臣雖不與八才子之列而實聯鑣並驅道思
與李中溪書云吾鄉洪芳洲先生文直得韓歐

曾王家法吾輩駁雜視之有
媿其傾倒至矣詩非擅長

送黃明齋歸姑蘇

往歲禪林居逢君同棲止予抱子興疾君洗巢父耳同
賦招隱吟肯効彈冠喜嗟予學不就冠帶束疲繭黽勉
江東行意君雲霧裏胡爲塵土間逢子亦在市髭髮半
霜根垢衣露敝泉良久問口談始憶君名氏君有博古
才五車在牙齒上精蒼頡書下綜姬公禮義畫卦之初
機經兵所起星書甘石文地志神禹紀探詣各窮源名

狀何切理遂令侯貴間傳客播芳美頗似驚座陳還如
使氣襴忽驚風露零頓使家園邇去來本無心別離亦
倏爾夫椒山窈深五湖水清泚請君具扁舟高卧從此
始

何遷二首

遷字懋益德安所人嘉靖辛丑進士累官刑部

侍郎有吉陽山房橐

李時遠云先生素講
理學詩亦冲淡典實

送人守綏德

戎馬猶嚴警旌旗復遠行
龍沙知上將燕頷本書生
樹引秦川直山連晉水清
因君思保障萬里見長城

萬松菴

青林千尺陰覆此山中
閣月出不逢人門前松子落

范惟一 二首

惟一字于中松江華亭人
嘉靖辛丑進士歷官

南京太僕寺卿有范太僕集

莫子良云太僕詩質而不浮麗而有

則

送人之廣東郡幕

春杪都門道清尊送客行一官趨郡幕萬里是王程瘴
嶺排雲入蠻煙入市生回看鄉國樹黯黯正含情

龍華廢寺

鴈塔猶初地龍華半劫灰棟虛雲氣隱簷漏日光來馴
鵲羣迎客香花亂點苔還憐杯渡者何日問津回

雷賀一首

賀字時雍豐城人嘉靖辛丑進士歷官右副都

御史巡撫四川有雷中丞律選

宿郢東驛

策馬驅殘日開軒候晚風
鳥迴雲夢北花發石城東
官況重來減風光別後同
幾番經夙夜身世歎飄蓬

謝東山一首

東山字少安射洪人嘉靖辛丑進士歷官右副都御史巡撫山東有近譬軒詩抄黔中小橐

次雲屏九日韻

海門孤嶼湧中流千古龍祠在上頭記得雙旌蒼水使
春風一舸下渝州

林懋和一首

懋和字維介閩縣人嘉靖辛丑進士歷官廣東
左布政使有櫟寄集

憩元福宮

碧殿依青嶂丹臺入紫霞聊因駐征蓋復此訪仙家洞
隱疑無路林凋尚有花山童陳石髓羽客進胡麻石上

柯初爛壺中景未斜赤松如可見從爾學丹砂

萬衣一首

衣字章父潯陽人嘉靖辛丑進士歷官河南左布政使有草禺子集

九日蒲圻張魏二省丈見邀

年年客裏逢佳節今日登高復異鄉二妙恰逢天上侶
孤臺宛在水中央白衣似爲幽人至黃菊能如故國香
別後出關秋正杪年華旅思共淒涼

王應鍾 一首

應鍾字懋復侯官人嘉靖辛丑進士歷官山東
叅政有缶音集

題謝中皋卷

林栖懷獨往人境迴遺羣一徑通樵路千山藹暮雲
禽當戶轉澗水向田分偃息亭皋上元言不可聞

龔秉德 三首

秉德字性之濮州人嘉靖辛丑進士歷官湖廣

按察副使有三幻集

朱中立云虹川詩和
粹婉麗藻思駿發

夏日齋居即事

首夏物始和端居恣游行林木花已敷池荷葉未展布
穀啼空桑流鶯下崇峴雨餘竹韻清日上巖光顯澄心
扇自捐縱目簾初卷偶因謝簿書兼得理墳典叨籍力
不任冒榮分非淺感茲華髮生滄洲若在眼神與元化
并思將遺慮遣守道情自愜處順顏無覲升沈嗟倚伏
明晦歎尋轉性本戀煙蘿敢云輕軒冕

曉發龍潭道中

霓旌蕩煙靄星駕轉峇堯水落龍潭淺山連雉堞遙林
昏猶辨月江冷不聞潮漸覺鍾陵近淒涼憶六朝

雨花臺眺望

崇臺縹緲出雲孤春日憑虛覽壯圖江繞潯陽遙辨楚
山連京口半吞吳秦淮風土憐今昔王謝豪華問有無
回首長干傷往事六朝煙雨半蘼蕪

鄭渭一首

渭字應清閩縣人嘉靖辛丑進士榜姓孫官至
河南按察副使有望川存橐

舟次桐江釣臺

乘舟入桐廬山水得佳憩伏岸倚灘隈連峰上雲際傍
石試躋攀臨流喜容曳日隨魚鳥閒心與漁樵契寂寞
古釣臺青蒼遠虧蔽天晴靈境幽日暮長川逝邈矣羊
裘人高名誰與繼

朱瑞登一首

瑞登字未仲海寧人嘉靖辛丑進士由桐城知縣選湖廣道御史歷按察副使有真逸先生集

中秋對月

林塘客萃止待月欣舉觴今夕勝昨夕已見生東方澄空斂煙霧彌覺清輝揚初猶樹枝杪俄頃天中央徘徊臨廣除白露霑我裳望信有度明晦何能常良時不屢值對此宜樂康毋容外物累長近君子光

李時行 三首

時行字少偕番禺人嘉靖辛丑進士除嘉興知縣徵授南京兵部主事有青霞集

詩話少偕罷官歸里與梁公寔黎維敬歐損伯吳蘭皋結社稱南園後五先生其詩體格雖卑然亦清穩無叫囂之習

別吳山人擴

客中仍送客離思渺難任岐路一尊酒故人千里心歸雲衝落鴈寒角亂秋砧湖海風塵裏前期何處尋

酬張符臺秋夜閣直見寄

禁苑含香入高秋
複道平踈星移鳳闕
明月上龍城
夜半聞天語
風前遲漏聲
思君在霄漢
清夢隔蓬瀛

寄廣陵高子通徐伯可

憶昔逢君客帝京
留連郎署十年情
看花並醉長干里
走馬同過白下城
春入吳宮芳草色
月明蕭寺暮鐘聲
別來迢遞天南北
一望江湖感慨生

張習一首

習字子翀寶應人嘉靖辛丑進士官郎中

塞上

密雲今重地遙望幾重山西入黃花鎮東連黑谷關邊
臣常帶甲齒女不垂髮慚負司農識蒸民食尚難

瞿景淳 一首

景淳字師道常熟人嘉靖甲辰賜進士第二授
翰林編修歷左諭德侍讀學士以太常寺卿領
南國子祭酒事陞南吏部右侍郎卒贈禮部尚
書諡文懿有文懿公集

秋懷

秋夜不能寐起視臨軒墀明月入我懷幽恨不自持憶
昨赴京洛正當月弦時月明幾圓缺我行無還期祇應
清光同千里長相思

吳桂芳一首

桂芳字子實新建人嘉靖甲辰進士累官工部
尚書兼副都御史總理河道有師暇裒言

東湖

東湖行一曲十里柳煙齊遠嶼浮空碧長雲壓水低岸
香聞杜若沙淨浴鳬鷺更愛維舟處夕陰蓮葉西

劉崙一首

崙字山父無爲州人嘉靖甲辰進士累官大理

寺少卿

天津即事

秋盡蒹葭白露晞片帆遙指朔鴻飛天橫絕塞孤雲遠
水遶寒城落照微四海徵求方訴急九邊征戍未言歸

天津橋上空回首封事誰當達禁闈

趙 鉞 三首

鉞字子舉桐城人嘉靖甲辰進士歷吏科都給事中陞南京太僕少卿有無聞堂橐

從軍行

從軍有苦樂從軍良不惡官家選民兵我軍只守城民兵負戈戰我軍立觀變民兵骨如山將軍不汗顏但得我軍在城墮不稱敗我軍生死將軍命將軍護軍如護

印將軍有時罪猶錄行賞我軍恐不速莫歎身無衣居
無屋但報寇入邊我軍有馬兼有粟如此從軍心亦足

白龍潭

白龍水底眠猶放雲光入有時化作人獨向峰頭立

古藤洞

古藤生洞口不遣游人入酌酒坐藤陰飛泉忽相及

胡安
三首

安字仁夫餘姚人嘉靖甲辰進士歷官苑馬寺

卿有趨庭集

黃太沖云樂山詩極多萬句

無題

春到春歸不旋軫
綠陰稠處花開盡
泥中何得粘飛絮
牆頭忽見過新筍
荒園落寞待我來
小車久閤無人引
獨倚南樓待月明
平生嬾作河陽尹

閨意

涼風動袖湖波起
岸頭月影如秋水
蓮房摘盡蓮葉低
含啼轉向芳閨裏
征鴈還從北地飛
山川何處不瞻依

應知薄倖思羅綺不著年年寄到衣

固原

柳色凋殘雨未收陽關西去更堪愁
平川落照連秦苑古道吹煙覆驛樓
刁斗風清初禁夜羶帷月冷盡防秋
雲山最是淒涼地今夜邊關第一州

汪一中一首

一中字正叔歙縣人嘉靖甲辰進士繇工部郎
中出爲江西按察副使閩廣寇至戰死贈光祿

寺卿諡忠愍有南華山房集

汪禹又云正叔近體典雅雄渾有盛

唐人
矩度

送吳舍人還楚

百年心事獨依依
千里思家願不違
燕塞夕陽孤鴈度
荆門秋雨一帆歸
曲終江上人何處
雲散荒臺夢已非
莫向鍾山賦搖落
朝廷獻納似君稀

任環一首

環字應乾長治人嘉靖甲辰進士歷官山東右

參政贈光祿寺卿

詩話倭人入犯任公大小數十戰功最多歸熙
甫詩云江南列郡盡乘城藏穴何人肯出兵惟
有使君躬探甲劉家港口看潮生公軀瘦瘠倭
人目曰瘦官人望而避之詩特其寄興然亦明
淨

和張石川野航之作

蘆花汀畔獨移船一曲滄浪興杳然已付世情流水外
遂令心事老江邊閒憑魚浪傳書帖淨愛鷗沙占酒筵
便與先生訂幽約乘槎直欲犯青天

江珍一首

珍字民璞歙縣人嘉靖甲辰進士除高安知縣
徵授禮部主事遷南京兵部郎中出知廣信府
轉按察副使歷浙江泰政按察使雲南右布政
使終貴州左布政使有華委堂集

汪禹乂云民璞五律溫厚

典雅蓋枕籍唐人而有得者

寄汪伯玉職方

聞汝燕山信秋深已飭裝如何冰雪候猶未到江鄉舟

揖關河阻兵戈道路長倚欄思不極雲樹渺蒼蒼

徐文通一首

文通字汝思永康人嘉靖甲辰進士歷官山東

按察副使

王元美云徐汝思如初調鷹見擊鷲故難獲鮮

岱宗

岱頂凌霄十八盤中原蕭瑟思漫漫振衣日觀三秋曙
倚劔天門六月寒風雨黃河通瀚海星辰紫極近長安
小臣願獻蓬萊頌閭闔高懸謁帝難

魏文煥 一首

文煥字德章侯官人嘉靖甲辰進士歷官四川
參政備兵松潘有石室私抄

遊武夷

躡步上昇真長揖紫霞客茲山多靈異想像銀臺闌瑤
草吐金光慧泉注丹液仙翁挾茅龍棄世如遺跡回首
謝所親尚留赤玉鳥我欲往從之茫茫水雲白誤與軒
冕期學道恐無益

張

才二首

才字茂參西安衛人嘉靖甲辰進士歷官按察

僉事

王元美云張茂參如荒僮渡江揖讓簡略故是中原門第

詩話元美評茂參詩比之荒僮渡江茂參之言曰自六義輟講而詩教浸衰五傳異觀而文體漸裂今昔殆不相及矣務艱者氣鬱而不信樂易者神渙而弗耀侈博者意累而靡潔至或思不通圓而極貌摹倣識未周洽而委心剽竄支戾勿經踏駁可厭篇帙雖富宜足稱哉其意亦似不滿於琅瑯歷下二子度其集必有可觀而惜其罕傳里有姚叟澣曾問其鄉先達茂參何名先達不能答則其論詩之旨聞之者益鮮矣

朝陵歌 二首

本朝陵墓傍燕闕殿閣參差霄漢間
王氣千年朝北極
雄圖萬里抱西山

松門回首七陵遙
春殿金燈鎖寂寥
地迴忽看星斗動
夜深疑有鬼神朝

劉鳳一首

鳳字子威長洲人嘉靖甲辰進士官至河南按

察僉事有澹思太霞二集

李于田云子威掘奇索隱抗心無前屠

長卿云侍御思苦志勞力勁神王沉淵無底排
雲直上陳卧子云子威意在獨造頗傷冗反
詩話子威局守于鱗唐無古詩一語數爲知言
其詩裝積纂組節節俱斷俾讀者茫然如墮雲
霧中吳趨土風清嘉不意出此鈍漢所著澹思
太霞二集類一時顯名者序之盛相揚調而吳
市賣卜人袁孟逸每向人挾謁其字句鉤棘文
義紕繆者以爲嫺笑子威聞而大怒愬之有司
有司既捷之而數之曰若敢復嫺笑劉侍御詩
文耶伏地對曰民寧更受笞數十不能妄諛劉
侍御也蓋草莽之公論尚存勝于士大夫曲徇多矣

懷友

迴思京洛日初及壯盛時極意但娛樂奄忽歲月馳亦

知計不立才薄靡所施良無根株託飛蓬安可期自我
與君居遠在天一涯出處道不同榮悴古有之反復念
疇昔筋力亦已衰會面諒無由願寄一言辭久要貴能
敦情義兩不疑勗哉崇明德式用慰我私

朱曰藩

五首

曰藩字子价寶應人嘉靖甲辰進士除烏程知
縣遷南京刑部主事改兵部轉禮部郎中出知
九江府有山帶閣集

王元美云朱子价如高坐
道人袂衣躡屐忽發村語

詩話升之詩倣北地子价則法用修其在金陵
懸用修畫像於寓齋焚以束官香薦以陽羨茶
賦人日草堂之詩與唐李才江尊賈浪仙為佛
事絕相類然其詩實與用修派遠由其牽絲西

吳蓋心慕蔡
白石故爾

贈袁河內

漢郡繇來重仍傳借寇行山從上黨斷河入大伾平訪
古停千騎班春徧百城西征雲物美憑軾賦先成

贈石城文選拜南太常

我祖都江左鍾山萬古憑朱旗唐鹵簿白露漢園陵懷

里心長往分曹事有恒清齋三五日贈子玉壺冰

飲罷

沙溪雨過漸通潮新漲朝來拍小橋九曲湖塘藏窈窕
數株門柳伴逍遙時魚饌客烹蘆筍海鶴驚人起稻苗
飲罷中庭不成寐夜間河漢正寥寥

將入雲中作

咫尺分邊地崎嶇出漢關今宵看太白一上紇干山

舟行

渌水平如鏡芙蓉媚遠天
時聞采菱曲唱近使君船

陳皋謨一首

皋謨字思贊江陰人嘉靖甲辰進士除知蒲州
歷南京工部郎中有薄遊北遊南都諸橐

環縣城遠眺

靈武孤城霽色開感時還上最高臺
山樓風急熊旗動關塞天連鳥道回
經略久寒西夏膽安危深仗北門才
殊方獨抱懷鄉思日暮愁聞畫角哀

劉爾牧一首

爾牧字長民一字成卿東平人嘉靖甲辰進士授戶部主事歷郎中忤嚴世蕃廷杖削籍有亮

麓集

王元美云成卿質秀才俊尚未成家

重陽前一日

楚天愁絕九迴腸漢水煙波動渺茫鴈盡北書無日到
秋深南菊爲誰芳江頭落葉催行路峴首浮雲蔽故鄉
惆悵年來遲暮意明朝風色是重陽

蔣孝一首

孝字維忠武進人嘉靖甲辰進士官戶部主事

顧元言云戶部才情綺麗頗任俠氣

贈顧少參

白下今才子華陽舊隱居早辭南省貴來著北山書邑有盧敖井山藏內史廬堂前曳珠履寧羨食無魚

方九叙二首

九敘字禹績錢塘人嘉靖甲辰進士有十洲集

同諸子游靈隱寺夜宿澗西房

厭喧慕幽棲惜陰耽夕憩梵宇枕山阿層巒延遠睇水
石互清華松篁紛蔽翳綠澗蔭芳椒依巖構禪砌嵐翠
菴簷牙靈籟響雲際曖曖日將頽淒淒風且曠稍覺朝
歡闌還因宵賞滯高閣謝塵囂流泉澄夢寐况復偶羊
何寧須狎支惠尚子欣遠遊嵇康慵作吏苟非賢達人
詎知身似寄

鳳山懷古

宋朝宮闕鳳山隈
輦路荒涼過客哀
青史尚留南渡恨
黃旗無復北庭回
沙埋舊井琉璃碎
蘚蝕殘碑翡翠開
歎息百年行在所
只今惟有梵王臺

余文獻一首

文獻字伯初
德化人
嘉靖甲辰進士
有九厓集
送翦子靜南還

十年繞返國何事
復南歸歲月冰霜晚
江湖鴻鴈稀
青山還舊業
落日初衣去
住乾坤裏
無嗟與世違

李汝蘭一首

汝蘭咸寧人嘉靖甲辰進士

溪上晚歸

徑路草萋萋歸人咫尺迷水聲聞犬吠月色見雞棲露
下沾衣濕星垂掛樹低今宵有風雨多在杜陵西

彭謙一首

謙字德光溧陽嘉靖甲辰進士有茭東橐

早行

畏塗兼歲暮假寐怯宵征
高柳霜前短殘星曉後明
板橋人度影畫角戍傳聲
野燒前山起羈心黯自驚

張居正 四首

居正字叔大江陵人嘉靖丁未進士改庶吉士
陞編修歷春坊學士以禮部侍郎入內閣官至
太師吏部尚書中極殿大學士卒諡文忠有太
嶽集

詩話江陵以奪情爲清議所不容然能自任天
下之重定陵冲年請大閱京營之士時掌中樞

者山陰吳尚書允也尚書繪圖藏之家予曩從
尚書孫錦衣使國輔處見之及戚武毅鎮薊大
臣行邊簡閱士馬隨上功狀疏恩晉秩烽火不
徹於甘泉者一十五年江陵之東國成可謂安
不忘危得制治保邦之要矣近靈壽傳尚書維
鱗撰明史記乃與分宜合傳毋乃過歟于文定
與邱尚書書云江陵以蓋世之功自豪固不肯
甘爲汙鄙而以傳世之業期其子又不使濫有
交游其平生顯為名高而陰為厚實以法繩天
下而問結以恩其深交密戚則有賂路人不
敢也債帥鉅卿則有賂小吏不敢也當其柄政舉
朝爭頌其功而不敢言其過及其既敗舉朝爭
索其罪而不敢言其功皆非其情實矣此足以
當爰書聞有題詩于故宅者云恩怨盡時方論
定封疆危日見才難
二語足稱詩史矣

恭勵聖學

元后輔萬邦綏猷良不易若稽古哲王多聞乃建事堯
舜帝者宗精一闡微義夏禹既祗德殷高亦遜志成后
務緝熙周詩咏小毖猗歟休烈光英聲播來嗣今皇體
睿明冲齡纂神器爰當訪落初即敞金華秘書帷簡儒
彥藝圃覃文思朝旻不遑暇寒暑靡暫離寰宇仰休明
風雲慶遭際顧以謏陋質無能補天地願言崇聖功問
學登純懿勿云天聰明無爲事博識圖書足自娛兼之

益神智勿云富春秋茂葉良可諉寸陰重逾璧居諸易
流駛勿云履崇高優游保天位君心苟縱逸萬幾遂顛
墜勿云當燕閒可以快志意一暴而十寒細行終爲累
戒彼鴻鵠心專精道乃致摯御必端良勿狎於匪類爲
山九仞崇成功虧一簣慎初惟克終終保無爲治愚臣
職司規敢以告中侍

莊敬太子挽歌

鶴馭凌霄漢龍樓鎖寂寥空悲仙路杳無復寢門朝綺

李辭金輅浮丘侍玉霄惟餘鳳笙曲猶逐白雲飄

舟泊漢江望黃鶴樓

楓林霜葉淨江煙錦石游魚清可憐賈客帆檣雲裏見
仙人樓閣鏡中懸九秋杳影橫清漢一笛梅花落遠天
無限滄洲漁父意夜深高詠獨鳴舷

潛江憫溺

水漲平堤沙岸迴野田今見荻花開江濤挾雨秋仍壯
塞鴈衝寒暮獨來歲晚風霜歎客枕夜深燈火傍漁臺

悲時已有江南賦愁聽荒城畫角哀

殷士儋

三首

士儋字正甫歷城人嘉靖丁未進士累官少保兼太子太保禮部尚書武英殿大學士卒贈太

保諡文通有金輿山房集

王忠伯云先生登高而賦餞別而歌體齊

魯之雅馴兼燕趙之悲壯采吳越之婉麗以求勝于歷下妻水之間

送劉希宏驛宰之高郵

迢遞淮南驛風煙隔楚波潮平漁火近日落客帆多遠

樹生鄉思青山入棹歌春來見芳草知爾憶鳴珂

送趙萬舉守淮安

聞道淮陰郡興圖屬上游雲連江國曙地接海門秋特
簡中朝彥遙分南顧憂青山迎列戟芳草待扁舟楚甸
歌新牧琅琊識故侯津橋通晚泊膏壤課春疇樹色依
官舍潮聲入驛樓知君富登覽吟興滿滄洲

題番馬圖

玉塞無聲夜有霜橐駝五萬入漁陽平沙落日悲風起

馬上橫捎四白狼

楊 巍 二十一首

巍字伯謙海豐人嘉靖丁未進士除武進知縣
入爲兵科給事中歷右都御史巡撫宣大陝西
山西入爲兵部侍郎陞南京戶部尚書召入改
工部復改戶部再改吏部加太子少保進太保
贈太師有夢山集朱中立云夢山詩不事雕繪
旨趣天成王貽上云先生
五言直舉胸臆真澹雅素而格在其中陶韋嫡
派儲王之鴈行又云先生詩蕭疎簡遠得淵明

摩詰之真品當在蘇門之次西原之上謝方
山云先生擅場本在五言其近體妙處發源王
孟接軌高薛嘉隆塵空之習曾未染其筆端故
是間代清律染沈山子云夢山五律固是長城
其全首矜鍊者不待言句如風雨樓蘭國關山
李牧祠春風吹戶牖芳草徧庭除薄地不盈頃
州房才數間漁樵原舊業荷芰有初衣花憶春
城發門連芳草多北牕風到處深樹鳥鳴時礪
雪春仍積岩花夏始開家貧人卧穩橋斷客來
稀杯外分平楚窗中到遠山霜笳連夕院野燒
到經臺野燒驚沙鴈霜風落塞榆人垂燈下淚
鬼哭雨中魂皆近自然豈四溟山人所能及
詩話夢山與中麓滄溟同郡而其詩遠法右丞
左司近取蘇門不蹈章邱獮鄙之音不墮歷下
叫囂之習信豪傑之士也集不甚傳近新城王
尚書德州謝郎中重為鏤板始行于世夢山自

言不知詩補晉臬時學使者曹君紀山謂當以
唐人爲宗且辨其體格及歸田四明呂山人往
來海上相與倡和共明此道云云呂山人者時
臣中甫也紀山名汴江陵人嘉靖辛丑廢吉士
仕至右副都御史巡撫雲南以夢山推許若是
度其詩必有可觀惜無好事如王謝兩公刻之
以傳也當嘉靖初北地信陽朝華已謝滄溟集
盛唐人字句以爲律一時宗之正猶隋苑剪絳
成花淺碧深紅未嘗不眩人目然生意絕少此
時讀夢山詩如水仙十囊江梅一萼嫣然薄冰
殘雪之外有不愛惜者耶

春日述懷

曉齋春雨歇一鳥當窗鳴山雲入我座不知在邊城風

心本閒曠偶無塵事縈手把楞伽讀忽已忘吾生軒冕
是何物可以嬰其情君子貴得道誰能顧浮名

醒後聞磬聲

泠然響清磬我思良悠悠披衣一起坐明月懸高樓遙
遙目天宇空濶萬象收此時無人言獨與太虛遊河清
不可俟天運倏已周冥心入無極真想在浮丘人生亦
晝夜身外更何求

漫翁詩

子美稱漫郎次山號漫叟兩公皆偉人斯名傳不朽余
本疎濶士且與病為偶性惟率其真名不居其右雖嘗
為文章不習韓與柳詩韻尚未諧况復辨好醜亦嘗涉
世故世故良難剖軌事與掄材舛錯恒八九自信惟此
心得失兩無有所幸遂歸來惟與鹿豕友耕也不知獲
漁也不用筭富貴若浮雲詩書成敝帚於今年八十萬
事空回首茫茫視天地未知誰長久仍欲惜豹文仍欲
競雞口縱得千載名何如一杯酒歲月自盈虛吾生無

譽咎從此稱漫翁可並古人否

送黎樂溪轉甘肅太僕

白嶺千山外黃河萬國西塞雲秋渺渺沙草日淒淒遠
地愁離別邊城尚鼓鼙昔賢名未泯勲業爾能齊

北樓口留別許參戎

絕塞難為別離尊駐晚暉悲風嘶去馬落葉上征衣野
燒臨河斷寒沙帶雪飛邊城人不到此後信應稀

忬州雨夜

世慮已難遣况當旅館秋寒城夜半雨故國夢中樓河
漢幾時曙蛩螢增客愁鴈門明日路鼓角入邊州

柏林寺別王計部寺即李晉王墓所

園陵今作寺秋草向沙陀事歎千年往人憐兩度過山
川明霽雪鐘磬帶煙蘿於此別知己尊前意更多

壬申九日登覽曠亭憶舊兼喜谷司馬初還次前
韻

往事真如昨登高復此間歲時人半老江海客初還暮

鴈聲偏疾寒花色自斑
不須多感慨東望有牛山

秋日閒居

笑我起居處寥寥一竹牀
長貧諳性命多病識行藏
地與紅塵遠秋連白日涼
山僧久不至木落井西堂

送汪山人遊山海

自是江湖客猶然變姓名
妻孥貧不問書畫老逾精
雲黯秦王島山高孤竹城
同誰登碣石醉看海濤生

雨夜董信溪過訪

卧病滄江上柴扉晝不開况茲風雨夕乃有故人來
遠屋吟黃葉疎燈照綠苔平生丘壑意共盡掌中杯

秋雨宿黑石嶺

嶺險藤迷路山高石作城片雲何處雨孤客此時情
茅屋幾家住秋風半夜生旅魂愁已絕况聽鼓鼙聲

早秋登龍門城樓

指點雲州地真爲漢北門八城臨大漠一路向中原
晴日山川映秋田禾黍繁文莊經略處父老至今言

經順聖川

野曠行人斷風高戍鼓鳴
青山鄰絕漠白日閉孤城
戎馬千年地江湖萬里情
不堪征戰後極目一沾纓

環縣早行

羌狄平無日滄江未擬還
燈前梳白髮馬上夢青山
薄曙羣峰外殘星杳靄間
雞鳴問何處已度古蕭關

蕭關北作

塞路山難斷天愁雲不開
遙驚戍火起數見羽書來
周

室朔方郡唐家靈武臺客心正多感羌笛暮堪哀

宿瓦雲驛

蕭條來野館秋草正淒淒復此聞風雨魚之厭鼓輦經
年堦樹老入夜怪禽啼獨坐生歸思田園渤海西

沙磧驛逢劉參戎

風塵滿目塞門間媿我書生鬢欲斑爲問干戈何日定
不知江海幾人還河聲暮遠沙邊驛雪色晴看天外山
全仗將軍能破敵莫令匹馬近三關

酬劉二府過嶺園

老喜高軒海上過，開尊嶺圃對煙蘿。
纔聞朔塞兵初罷，豈料中原事漸多。
話到蒼生流涕淚，愁臨岐路遡山河。
眼前君最強，吾意國士寧論甲乙科。

春日南墅讌集

南郭春偏好，留人到夕陽。
風吹山鳥語，花落酒杯香。

憶舊有感

丁卯橋西憶舊遊，綠楊高映酒家樓。
故人莫訝凋零盡，

一別江南四十秋

陸光祖 一首

光祖字與繩平湖人嘉靖丁未進士累官吏部
尚書贈太子太保諡莊簡

金陵懷古

宰木蕭蕭起暮風君王不復渡江東
舞衣滿地生新草過客沿溪問舊宮
垓下一朝騅不逝咸陽三月火徒紅
英雄轉鬪無完策四面悲歌入帳中

林

爌 六首

爌字貞恒閩縣人嘉靖丁未進士累官南京禮

部尚書贈太子少保諡文恪有對山集

王伯穀云先生

詩文爾雅若璞玉渾金
無詞人藻繪刻鏤之習

馬侍御宅偕同館諸文讌集

人生百年內奄忽浮雲馳隨風日萬里聚散難可期昔
我同門友王事各乖離豈伊道路遠邈若天一涯三秋
積晨暮耿耿懷相思何悟升斯堂復得一追隨豐穀列

綺席美酒溢金卮相見各怡然獻酬吐芳辭蘭膏繼明
晝良夜殊未疲鳥棲戀共林魚遊樂同池交誼古所敦
久要諒不移今夕良宴會貽爾伐木詩

舟發芋江別諸兄弟親友

宦遊二十載幸始歸故鄉盤桓未及久戒徒復嚴裝豈
不戀樂土王事有靡遑遲遲出郊郭回顧悽以傷秋風
何飄飄吹我征衣裳兄弟送我行執手淚數行親戚送
我行各攜壺與觴日暮客程促踟躕猶路旁泛舟沂大

江怨彼道里長落葉雖隨風遶樹自飄揚禽鳥失儔侶
嗷嗷鳴迴翔矧伊骨肉情離別天一方暫且赴簿領行
當返耕桑努力各自愛引領遙相望

工曹後園觀稼

伊昔仕京華不忘畎畝志幸此南土遷公署有餘地後
園懇爲田蕪穢舊已治陽春倉庾鳴四壁肇農事晨興
戒農夫播種及時至簿言勸其勤益殫餉數罷實閔東
作勞豈要西成利周行阡陌間嘉樹或時憩即日雖暫

欣於心慨未遂伐檀刺素餐鵜梁譏竊位自顧魯鈍姿
食浮久吾愧悠悠望故山懷古有深意寄謝沮溺羣高
蹤庶可企

孝烈皇后挽歌

鳳穴金宮秘龍章寶冊宣曾將五色石能補九重天桂
殿花空落松門月自懸惟餘歌懿德長續二南篇

送二兄謫平樂貳守

暫會仍分手離魂黯欲銷如何適萬里況乃傍三苗中

土風煙隔征途雪霰飄
願將盤錯意持報聖明朝

詠史

朱雲折檻日賈誼上書年
感激廷空爭飄零席始前
白頭槐里令青簡汨羅篇
直道元如此千秋世共憐

王樵
五首

樵字明逸金壇人嘉靖丁未進士累官南京右
都御史贈太子少保諡恭簡有方麓集

詩話方麓研心著書自言六經畢其四詩特游
藝然清婉軼倫當觀觀太函白榆澹思叫囂之

會乃聞此雅韻
實獲我心也

短歌答趙江都金山見懷之作

海門兮長風中流兮孤嶼懷美人兮何方覽大江兮東
去

香山寺

曉色開層閣春天淨翠屏檻凭千樹綠門掩四山青遠
寺分林見流泉夾路聽禪房人不到花竹晝冥冥

除夕

塵事俄消日他鄉亦作年功名慙鏡裏兒女且燈前

望湖亭 二首

平疇門外春雨遠寺山西夕陽柳暗溪橋輦路水肥種
桂江鄉

孤邨數家隱樹一曲清流抱山四月城中未有林端黃
鳥關關

宋儀望 三首

儀望字望之吉安永豐人嘉靖丁未進士歷官

僉都御史巡撫應天進大理寺卿有陽山亭華陽館集

初去吳門作

營世無疾途筮仕獲下秩綰綬出明邦感懼情非一雖
抱濟物情良缺經世術簿書日紛紜督賦無寧日覩茲
民力艱焉忍事桔槔淳風古已頽文質相毀蝕慙無下
堂化何由示師帥直道既已危降志還見嫉沉憂結衷
腸能不慚三黜徵書來日下濫此擢朽質新恩詎云辭

夙抱未及畢驅馬出郭門寒風正蕭瑟道傍凍餒人對
我長歎息殷勤謝父老聊以微衷述

自樂城趨柏鄉

朝發藥子邑暮投柏人鄉驅車多所經指顧情內傷燕
趙昔吞并四海如沸湯豪俊相馳騫一言決興亡故壘
何蕭條云是古戰場俯仰今昔間沉痛結衷腸纍纍道
傍冢誰辨愚與良燕昭既不存平原客久荒不見黃金
臺樹木鬱蒼蒼蒼息駕暮雲沉感歎彌難忘

遊梅仙山

白雲在深山山深轉空翠古木凌飛煙叢竹亦森邃梅
公隱何時漢道昔云季當其抗言時鼎鑊寧足畏一斥
眇何所去作南昌尉茲山信超曠盤鬱多佳氣幽棲亦
何爲豈不以我貴一朝變姓名挂冠從此去新舊相太
息妻子不知處余亦骯髒人誤觸當時諱見幾苦不早
撫已有深媿永願謝塵緣長往從我志

胡杰一首

杰字子文豐城人嘉靖丁未進士改庶吉士歷
南京國子監祭酒陞太常寺卿有劍西橐

九日馬西田侍御讌具瞻樓

亭閣崑崙俯一丘
柏臺清讌復高秋
籬邊黃菊經時晚
谷口青驄竟日留
抱病有懷仍對酒
自公多暇幾登樓
臨風不用傷搖落
歸路月明山更幽

馬一龍二首

一龍字貞圖溧陽人嘉靖丁未進士改庶吉士

歷官國子監司業有遊藝集

湖上有懷

湖上青山半入城
湖中風景坐來清
高飛雙鶴與天近
遠去孤舟隔水明
為客故鄉秋鴈杳
懷人落日暮雲平
無端忽起思歸念
相對尊前共一傾

新豐夜泊

新豐市上酒家邊
夜泊沽來不用錢
北風吹雨欲作雪
客子到家將近年
京國書傳千里外
剡溪路入小村前

深林舊有高人隱尋到梅花却繫船

章适一首

适字景南蘭溪人嘉靖丁未進士歷官禮科給

事中

塞下曲

材官三十萬日夜出臨洮不見風塵息惟聞甲第高
盤鵬依陣落獵馬向秋豪辛苦從征地黃沙蔽白蒿

孫永思二首

永思字性孝蒲州人嘉靖丁未進士除行人選
授浙江道御史

海珠寺讌同鄉李崔二鴻臚

象設鄰鮫室江流達海門上方無陸路四壁有潮痕香
霧籠珠樹飛花墮玉尊漁歌相聽處萍水不須論

登鎮海樓用韻

越王臺接五城樓島嶼連空起暮愁瘴海波濤浮日月
炎天風雨自春秋亂帆歸晚聲相軋萬樹邊江葉盡流

莫向危闌聽吹笛
武陵離思在南州

詩話二詩侍御巡按廣東
時作蓋嘉靖丙辰年事

楊繼盛 二首

繼盛字仲芳容城人嘉靖丁未進士除南京吏
部主事入為兵部員外郎坐論馬市貶狄道典
史稍遷知諸城縣陞南京戶部主事轉戶部員
外調兵部疏劾嚴嵩論死贈太常少卿諡忠愍
有集

皇甫子循云楊忠愍辭尚宏麗語罕怨詆
江河一瀉乃徹其才光燄萬丈悉由于氣

蔣仲舒云楊公忱慨赴死讀其詩想見其人沒世而後猶有生氣

送徐子與讞獄江南

寥落白雲司半虛看君此去更何如
西曹月滿幽人榻南國星隨使者車
塞雁不堪行斷夕秋風況是葉飛初
秣陵故舊如相問爲道疎狂病未除

懷鶴峯東城因寄

屋梁落月應懷我春草池塘更夢誰
記得別時懸淚眼佯爲笑語怕相思

彭

輅二首

輅字子殷嘉興人嘉靖丁未進士除江西布政

司照磨遷知新淦縣左遷應天儒學教授轉國

子監博士陞南京刑部主事有比部集

焦弱侯云先生

詩意高簡冲融婉秀卓然名家是時七子出互相矜調雖有名於時而辭調往往如出一人先生能爲衆所不爲不少敗

以就俗宜其知者鮮矣

詩話先生早慧于詩文不甚敦琢其持論取法中唐謂神在象外象在言外言在意外然率天口肆筆而成頗類解大紳士華伯一流昔人所以有才多之憾也

良鄉道中

昔去經衰柳今歸見早梅
緇塵飛不盡白日黯難開
短劍餘孤憤長歌動七哀
年年薊門道空老洛陽才

送祝學博之當塗

姑熟城頭月常邀采石雲
山齋看不厭聊以贈夫君

簷菜一首

萊字時殷常山人嘉靖丁未進士有招搖館集

漁火

絕浦漁燈暗空江月色多關山空有恨欸乃忽聞歌風
靜星河沒天寒木葉波孤舟無住止獨酌奈愁何

沈淮一首

淮字澈伯仁和人嘉靖丁未進士有三洲集

積雨不能出有懷湖上

霞樓月榭欲生塵水上煙雲積幾旬滿地山花應笑我
雨中春色屬他人

甘茹一首

茹字征父富順人嘉靖丁未進士歷官按察副使

送成邑博

江城秋色暮客子欲何之
司馬浮湘日元王設醴時
風吹猿峽冷霜落鴈峯遲
欲識相思調君聽苦竹詞

鄭東白一首

東白字叔曉莆田人嘉靖丁未進士官至按察僉事

釣舟

空亭一葉下落日五湖秋白憤攜尊酒滄波坐釣舟鐘
聲山外寺樹色水邊樓吾愛鷓鴣夷子浮家汗漫遊

周思兼

三首

思兼字叔夜松江華亭人嘉靖丁未進士除知
平度州遷工部員外郎有周叔夜集

送李羅村大叅河南憲長

春風斗酒邵陵西新柳依依綠滿堤征馬不須催客去

金匱山房詩集
卷四十八
暮猿何事向人啼道經湘水花初發夢繞漳河路欲迷
故舊那堪頻送別愁看芳草轉萋萋

題畫

遠渚蘼葭滿孤村風雨多明朝江上路誰載酒船過

送林雙池

故鄉故人今別離春風春草各天涯尊前相對唯今日
去後相逢知幾時

明詩綜卷四十八